



31. august 2018

Inatsisartut Suleriaasianni § 37 imm. 1 naapertorlugu Naalakkersuisunut apeqquut imaattoq matumuuna saqqummiuppara:

**Naalakkersuisunut apeqquutit:**

**1. Nunatsinni talittarfinni nunamiit kallerup inneranik umiarsuarnut takornariartaatsinut pilersuisinnaaneq pilersinneqarnikuua?**

**2. Taamaassimappat sumi taakku pilersinneqarnikuuppat?**

**3. Umiarsuit takornariartaatsit nunatsinni talittarfinnut talikkaangata peqquneqartarpat, nunamiit kallerup inneranik pilersorneqarnissamik?**

**4. Nunamiit kallerup inneranik pilersuutit talittarfinni pilersinneqarsimanngippata, Naalakkersuisut pilersaaruteqarpat sanaartornissammik?**

**5. Kallerup inneranik pilersuutit sanaartornissaannut pilersaaruteqartoqarpat, qaqugu sumilu taakku sannaartorneqassappat?**

(Inatsisartunut ilaasortaq Steen Lyngge, Demokraatit)

**Tunngavilersuut**

Nunatsinni iluaqutaasumik takornariaqarneq ineriartorpoq. Immikkut oqaatigineqarsinnaasumik umiarsuit takornariartaatsit nunatsinnut tikittarnerat annertusiartorpoq, ukioq 2018 assersuutigalugu illoqarfinnut annerusunut tikittussat 55 missaaniissasut naatsorsuutigineqarpoq. Umiarsuit takornariartaatsit tulattarfimmiinnerminni Heavy Fuel atorlugu maskinatik ingerlatiinnartarpat kallerup innaallagiaanik atorfissaqartitaminnik pilersitsisinnaagumallutik. Ilisimaneqarpoq Heavy Fuel avatangiisinut aammalu peqqissutsimut ulorianartuusoq.

Avatangiisitta aammalu peqqissutsimut ulorianarsinnaasunik akiuiniarnitsinni aallartiffeqartariaqarpugut, tamannalu anguniarlugu Heavy Fuel-imik atuineq annikillisaanikut aallartiffigisinnaavarput. Avatangiisitsinnut aammalu peqqissutsimut ulorianarsinnaasut annikillisarmissaannik inuiaqatigiittut pisussaaffeqarpugut, taamaammat pisussaaffigaarput Heavy Fuel-ip atorneqarnera annikillissavarput taamatullu umiarsuit takornariartaatsinut piumasaralugu umiarsuit tikikkaangata nunamit kallerup inneranik pilersorneqartarnissaat. Tamannalu pilersissagutsiguk pisariaqarpoq nunamiit kallerup inneranik pilersuuteqarnissaq.

Tamanna tunngavigalugu qilanaarpunga akissutit tigunissaannut ullut sulliviit naliginnaasut qulit iluanni.